



REPUBLIKA E KOSOVES-REPUBLIKA KOSOVA-REPUBLIC OF KOSOVO
KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS
NEZAVISNI NADZORNI ODBOR CIVILNE SLUŽBEKOSOVA
INDEPENDENT OVERSIGHT BOARD CIVIL SERVICE OF KOSOVO

| | | | |
|---|---|------------------------------|-------------------------------|
| Pranimar / Dorezuar Priljenos / Priljeno Received / Delivered | 23 . 11 | 0 | viti god year |
| Organ / Bëvesia Organ / Jednoca Org. / Unit | In. Pict. In. Pict. In. Pict. No. | Shtesa Prilog Appendix | Sasia Kolicina Quantity |
| SKPMSTHCK | 2733/2020 | | 119 |



Republika e Kosovës Republika Kosova – Republic of Kosovo

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS
NEZAVISNI NADZORNI ODBOR CIVILNE SLUŽBEKOSOVA
INDEPENDENT OVERSIGHT BOARD FOR THE CIVIL SERVICE OF KOSOVO

A.nr.283/2020

Këshilli i Pavarur Mbikëqyrës për Shërbimin Civil të Kosovës – Kolegji për shqyrtimin e ankesave i përbërë nga: Jeton Koca-kryetar, Malsore Gashi-Bajraktari dhe Eshref Shabani-anëtarë dhe Ilire Mehmeti-Shaqiri, Zyrtare e lartë për Bashkëpunim Profesional në cilësinë e procesmbajtëses, ka shqyrtuar ankesën A.nr.283/2020 të datës 02.10.2020, të parashtruar nga [REDACTED], nga Fshati Sllatinë e Epërme Rr. "Nazmi Azemi", nga Komuna e Vitisë, kundër organit të punësimit Agjencia për Zhvillimin e Bujqësisë, në çështjen juridike "Pezullim parandalues", duke vepruar në pajtim me nenin 6 paragrafin 1 nen paragrafin 1.1, dhe nenin 18 paragrafin 1 nen paragrafin 1.1 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, dhe Rregulloren Nr.03/2018 për Rregullat dhe Procedurat e Ankesave në Këshillin e Pavarur Mbikëqyrës për Shërbimin Civil të Kosovës, në seancën për këshillim dhe votim, me datë 23.11.2020, mori këtë;

V E N D I M

- I. REFUZOHET si e pa bazuar ankesa A.nr.283/2020 e datës 02.10.2020, e parashtruar nga ankuesja [REDACTED].
- II. MBETET në fuqi Vendimi 07/4-1573 i datës 03.03.2020 i Kryeshefit Ekzekutiv të Agjencisë për Zhvillimin e Bujqësisë.
- III. Vendimi hynë në fuqi ditën e nënshkrimit nga Kryetari i Kolegjit.

A r s y e t i m

[REDACTED], Zyrtare e lartë e Autorizimit të Pagesave në Agjencinë për Zhvillimin e Bujqësisë pran Ministrisë së Bujqësisë, Pylltarisë dhe Zhvillimit Rural, me datë 03.03.2020 përmes vendimit me numër të protokollit 07/14-1573 të Kryeshefit Ekzekutiv, është pezulluar nga marrëdhënia e punës me 50% të pagës mujore, pas njoftimit të Zyrës së Prokurorit të Shtetit së ndaj saj është ngritur aktakuzë për vepër penale "Keqpërdorim i pozitës apo autoritetit zyrtar".

Pas hyrjes në fuqi të Ligjit për Zyrtarët Publikë, ankuesja me datë 09.07.2020 ka parashtruar kërkesën me numër të protokollit 07/4-3701 në Agjencinë për Zhvillimin e Bujqësisë, përmes të cilës ka kërkuar shfuqizimin e vendimit numër 07/4 -1573 për pezullim parandalues, pasi që sipas dispozitave të Ligjit Nr.06/L-114 për Zyrtarët Publike, pezullimi parandalues mund të bëhet vetëm me vendim të gjykatës.

Kryeshefi Ekzekutiv i Agjencisë për Zhvillimin e Bujqësisë, me datë 04.09.2020 ka refuzuar kërkesën e ankueses me arsyetimin se Ligji për Zyrtarët Publik, nuk ka fuqi vepruese në mënyrë retroaktive.

E pakënaqur me përgjigjen e Kryeshefit Ekzekutiv të Agjencisë për Zhvillimin e Bujqësisë, ankuesja me datë 02.10.2020 ka parashtruar ankesën me numër të protokollit 283/2020 në Këshillin e Pavarur Mbikëqyrës për Shërbim Civil të Kosovës.

Këshilli i Pavarur Mbikëqyrës për Shërbimin Civil i Kosovës, më datë 06.10.2020 ka kërkuar përgjigje në ankesën e ankuesit nga Agjencia për Zhvillimin e Bujqësisë. Këshilli më datë 13.10.2020 ka pranuar përgjigjen në ankesë, bashkë me shkresat e bashkëngjitura të lëndës.

Kolegji për shqyrtimin e ankesave për marrjen e vendimit meritore ka administruar këto prova: Ankesën A.nr.283/2020 me numër të protokollit 1961/2020 të datës 02.10.2020 drejtuar Këshillit të Pavarur Mbikëqyrës për Shërbim Civil të Kosovës: Përgjigjen në kërkesë me numër të protokollit 4912 të datës 04.09.2020: Vendimin numër 1573 të datës 03.03.2020 për pezullim parandalues: Kërkesën me numër të protokollit 1993/2020 të datës 06.10.2020 për përgjigje në ankesë: Përgjigjen në kërkesë me numër të protokollit 2073/2020 të datës 13.10.2020: Akt Emërimit me numër të protokollit 7878 të datës 30.11.2018: Vendimin me numër të protokollit 2466 të datës 14.06.2018: Kërkesën me numër të protokollit 37.01 të datës 09.07.2020 për shfuqizimin e vendimit për pezullim parandalues: Njoftimi me numër të protokollit 3956 të datës 22.07.2020: Listën e pagave për periudhën kohore 01.09.2020 deri 30.09.2020 si dhe 01.08.2020 deri 31.08.2020: E-mailin me numër të protokollit 2409/2020 të datës 03.11.2020: Njoftimin me numër të protokollit 06/2 të datës 12.02.2020 të Kryeprokurorit të Shtetit:

Kolegji për shqyrtimin e ankesave, pasi ka shqyrtuar të gjitha shkresat e lëndës, ka konstatuar se ankesa e ankueses *është e pa bazuar, sepse:*

Kolegji për shqyrtimin e ankesave, bazuar në shkresat e lëndës ka konstatuar se Kryeshefi Ekzekutiv i Agjencisë për Zhvillimin e Bujqësisë, pas njoftimit të Zyrës së Prokurorit të Shtetit së ndaj ankueses është ngritur aktakuzë për veprë penale "Keqpërdorim i pozitës apo autoritetit zyrtar", me datë 03.03.2020 ka nxjerr vendimin me numër të protokollit 07/4-573 për pezullimin e ankueses nga detyra me 50% të pagës mujore, deri në marrjen e vendimit përfundimtar nga gjykata.

Kolegji, vlerëson se vendimi për pezullim parandalues është nxjerr në pajtim me dispozitat e Ligjit Nr.03/L-149 për Shërbimin Civil në Republikën e Kosovës, përkatësisht nenin 69 paragrafi 1 nen paragrafi 1.1, ku përcaktohet së: *1.Nëpunësit civilë pezullohen, me pagesë 50% të rrogës së tij/saj, menjëherë nga detyra nga organi përgjegjës për menaxhimin e personelit të institucionit punëdhënës nëse: 1.1.kundër tij/saj është iniciuar procedurë penale për kryerje të veprës penale gjatë ushtrimit të funksioneve të tij/sajë, dhe paragrafi 2, ku përcaktohet se: Në rast të pezullimit*

parandalues, nëpunësi civil do të marrë 50% të rrogës së tij/saj gjatë tërë kohëzgjatjes së pezullimit, deri në marrjen e vendimit përfundimtar nga gjykata.

Ankuesja në ankesën e saj pretendon se me hyrjen në fuqi të Ligji Nr. 06/L-114 për Zyrtarët Publikë, është shfuqizuar Ligji për Shërbimin Civil, andaj Vendimi 07/4-573 për pezullim parandalues nuk ka mbështetje ligjore dhe si i tillë duhet të shfuqizohet.

Kolegji për shqyrtimin e ankesave, lidhur me pretendimin ankimor të ankuesit ka analizuar dispozitat e Ligjit për Zyrtarët Publik dhe ka konstatuar se me dispozitat e nenit 56 të këtij ligji janë përcaktuar rastet kur pezullohet nëpunësi civil sipas detyrës zyrtare nga organi përkatës i punëdhënësit, ku sipas paragrafi 1 nen paragrafi 1.4 të kësaj dispozite ligjore përcakton se: *nëpunësi civil pezullohet nga detyra kur gjykata vendos ndaj nëpunësit civil si masë parandaluese penale pezullimin e ushtrimit të detyrës apo shërbimit publik, sipas ligjit në fuqi.* Në këtë kontekst Kolegji ka analizuar edhe dispozitat e nenit 69 paragrafi 1 nen paragrafi 1.1 të Ligjit Nr.03/L-149 për Shërbimin Civil në Republikën e Kosovës, dhe ka konstatuar se pezullimi parandalues në kuptim të këtyre dispozitave ligjore nuk është masë disiplinore e cila i shqiptohet nëpunësit civil për shkelje të detyrave të punës, por është masë parandaluese e cila merret në raport me një procedurë të iniciuar penale ndaj nëpunësit civil dhe ka për qëllim sigurimin e zbatimit të suksesshëm të procedurës penale. Andaj, nisur nga kjo, Kolegji për shqyrtimin e ankesave konsideron së për rastet pezullimit parandalues të cilat kanë filluar sipas dispozitave të nenit 69 paragrafi 1 të Ligjit Nr.03/L-149 për Shërbimin Civil, nuk mund të aplikohet neni 56 paragrafi 1 nen paragrafi 1.4 të Ligjit Nr.06/L-114 për Zyrtarët Publik, sepse është e ndaluar fuqia prapavepruese e normës juridike, përveç nëse një gjë e tillë përcaktohet me ligj. Kolegji për shqyrtimin e ankesave, ka analizuar edhe nenin 83 paragrafi 9 të Ligji Nr. 06/L-114 për Zyrtarët Publikë, e cila përcakton se; *... Për procedurat disiplinore në proces, nëse kjo është më e favorshme për nëpunësin civil në fjalë, me kërkesën e tij, zbatohen procedurat e ligjit të ri. E njëjta procedurë do të aplikohet për procedurat e ankesave dhe kontesteve,* dhe ka konstatuar se kjo dispozite ligjore i referohet vetëm procedurave disiplinore dhe procedurave të ankesave, por jo edhe masës së pezullimit parandalues e cila nuk është masë disiplinore por është masë parandaluese e cila vendoset vetëm pas plotësimit të kushteve ligjore në procedurë penale, dhe është e lidhur me zhvillimin e procedurës penale deri në vendimin përfundimtar të gjykatës, andaj si rrjedhore, Kolegji vlerëson se nëpunësit civil të cilët janë pezulluar sipas dispozitave të Ligjit Nr.03/L-149 për Shërbimin Civil në Republikën e Kosovës, mbi këtë bazë ligjore duhet të vazhdoje pezullimi deri në marrjen e vendimit përfundimtar nga gjykata, siç përcaktohet me nenin 69 paragrafi 2 të Ligjit Nr.03/L-149 për Shërbimin Civil në Republikën e Kosovës, kështu që Kolegji vlerëson se pretendimi ankimor i ankuesit lidhur me anulimin e vendimit për pezullim parandalues dhe kthimin në vendin e punës, është i pa bazuar.

Bazuar në këto rrethana, Kolegji për shqyrtimin e ankesës, pas analizimit dhe vlerësimit të të gjitha shkresave të lëndës si dhe duke u bazuar në kompetencën e Këshillit, vendosi si në dispozitiv të këtij Vendimi.

Këshillë juridike: Kundër vendimit të Këshillit, pala e pakënaqur e cila pretendon se vendimi i Këshillit nuk është i ligjshëm mund të iniciojë konflikt administrativ në Gjykatën Themelore në Prishtinë-Departamenti Administrativ, brenda afatit prej tridhjetë (30) ditësh nga dita në të cilën i është dorëzuar vendimi. Inicimi i konfliktit administrativ nuk e ndalin ekzekutimin e këtij vendimi.

Këshilli i Pavarur Mbikëqyrës për Shërbimin Civil të Kosovës
Lënda me numër A.nr.283/2020

Ilire Mehmeti-Shaqiri

Procesmbajtëse

Jeton KOÇA

Kryetar i Kolegjit

Vendimi i dërgohet

- Ankueses ██████████;
- Kryeshefit Ekzekutiv të Agjencisë për Zhvillim të Bujqësisë;
- Udhëheqësit të Burimeve Njerëzore në Agjencinë për Zhvillim të Bujqësisë; dhe
- Arkivit të KPMSHCK-së.